

滇

南

襍

志

滇南雜志

滇南雜志卷十四

上海曹樹翹春林編

軼事八

樹頭酒

南史云南海頓遜國有酒樹似安石榴採其花汁仵甕中數日成酒甘
美舊志云樹頭酒樹類梭高五六丈結實大如李土人以麩納罐中以
索懸罐於實下倒其實取汁流於罐以爲酒名曰樹頭酒或不用麩惟
取汁熬爲白餠其葉卽貝寫緬書用之譚用之詩云昔年南去得吳嬪
頓遜杯前共好春南州見物志亦載其事今緬甸軍民宣慰司有此

朱提浮酒瓶

朱提浮酒瓶唐太宗宴回紇於秘殿設此其瓶可受百斛酒數千人飲
之不能盡今緬中不聞有此

苧醬

苧醬之名見於史記注釋亦明矣因宋周益公偶失記而妄對苧醬之名顧益顯此物爲永昌所產蜀都賦所謂緣木而生其子如桑椹長二三寸是已生時深綠色日乾卽黑雲南檳榔以此及濾淨石灰合而嚼之有香味呼爲蘆子廣西以三賴及蘘葉共食乾硬無味

按蘆子出騰越最多蓋達有蘆子山張南園謂卽苧醬吳志云其說難信然張說不可易也蓋苧莢二物苧苗似天南星其形可惡而根大倍於芋魁有似盆盎者以石灰水浸之治如豆腐煮食俗名鬼廟一名廟頭蓋鬼者魁之譌莢轉讀爲烏又譌廟耳苧者乃藤本緣樹而生子如桑椹熟時正青長二三寸以蜜藏而食之黔滇人以合檳榔食但不知爲醬耳又按蘆子其味辛卽本草之蘘葖也染坊染大紅色必以此與紅花同浸其色方顯

雞窠

菌屬滇中在在有之惟蒙自爲最以六七月大雷雨後生沙土中或松下或林中鮮者多蟲間有毒或云其下有蟻穴出土一日卽宜採過五日卽腐採後過三日則香味俱減土人鹽而脯之經年可食若熬液爲油以代醬豉其味尤佳濃鮮美艷侵溢喉舌洵爲滇中佳品

檳榔麩

後漢書朐疇縣有檳榔木可爲麩百姓資之注云檳榔樹六四五圍長五六丈皮有毛似枳櫚而散生其木剛作鋸鋤利如鐵皮中似擣稻又類麥麩可作餅餌范成大桂海志云檳榔直如杉有節似大竹一幹挺上開花數十穗綠色

檳榔

檳榔樹高十餘丈皮似青銅節如斑竹葉如芭蕉花如金粟實纍纍綴

於房中土人剖其實貫以藤風戾而食之佐以扶留及石灰消宿食祛瘴癘

靴豆

靴豆野生山中人亦有種者其葉如豇豆葉但文理偏斜六七月開花成簇紫色狀如扁豆花一枝結莢十餘長三四寸大如拇指有白茸毛老則黑而露筋宛如乾熊指爪之狀其子大如刀豆子淡紫色有斑點如狸文煮之有黑汁食之令人悶暈食頃方已或云去黑汁同雞猪肉再煮食味乃佳按此爾雅之虎粟俗以其子有狸文謂之狸豆以其汁黑謂之黎豆黎亦黑也豆莢毛黑穉如熊虎爪故亦謂之虎豆而滇人見其莢老黑鼻起如革鞮然是以呼爲靴豆又郭璞云江東呼粟爲藤纏蔓林樹莢有毛刺一名豆薹亦卽此物也雲南山中多有之而棄不取想亦以其有小毒之故耳

丹砂

逸周書王會篇曰卜人丹砂西南之蠻丹砂所出卜人蓋今之濮人也
又曰湯令伊尹爲四方獻令尹曰臣請正南甌鄧桂國損子產是百濮
九菌請令以珠璣璫瑁象齒文犀翠羽菌鶴短應作狗爲獻

孔雀

華陽國志云雲南郡出孔雀常以二月來翔月餘而去今瀾滄江濶多
孔雀其食金剛纂故羽有毒常浴於江誤食水亦殺人好事者捕之畜
於家飼以稻粱年餘乃無毒矣野人得其卵令雞翼之亦能出但毛羽
不鮮耳今例貢有孔雀勝騰越於秋後飭各關撫夷購之皆於關外獵
取

鸚鵡二則

後漢興平元年蠻夷獻鸚鵡三詔曰往者益州獻鸚鵡三枚夜食麻子

三升今米價騰貴此鳥無益有損可付安西將軍楊定國令歸故土
明定遠王沐晟素軒集載永樂庚子春麗江土知府木初獲黃色鸚鵡
一遣其子土來送余見此鳥稟中央之色得山川之秀性情馴良辯慧
能言善解人意紺趾丹嘴柘衣素衿雖無文彩而妙質奇姿誠南中異
禽也余不敢私貢於朝因繪斯圖以記之又土知府木增嘗得白鸚鵡
養之甚馴題有性鍾靈巧人爲語體厭繁華雪作裳之句見雲籟集

燕

李三樂解任歸里一日兀坐見梁燕墮雛爲猫所捕李心惻然及就窠
見燕猫在衾枕間燕若依猫猫如字燕呼子惟恒曰有是哉董生行於
茲再見也

金雞

開化府西北與阿迷接壤處有山奇峭崢嶸面開一穴光圓如鏡土人

耕其下者夜聞雞聲清亮後有客架棚守候經十餘宿而去雞聲遂不復聞自金雞崖北向二里許石高三尺餘廣如之屹立道左若小屏然一夕忽被人鑿其當中一孔內空一窟圓深滑潤不知取去何物適有西洋人暫隱至滇丈量嚮道過其地留連久之曰不圖此間有奇物產金雞天馬然皆爲人取去始知石穴中之爲天馬前此所聞者固金雞也

背明鳥

三國吳黃龍元年越雋之南獻背明鳥於吳形如鶴止不向南巢常向北多肉少毛聲音百變聞鐘磬笙竽之聲則奮翅搖頭時以爲祥吳人譌呼爲背亡人以爲不及百年當有喪亂之事後鳥不知所在

嗽金鳥

魏明帝時昆明國貢嗽金鳥出燃洲形如雀而色黃羽毛柔密常吐金

屑如粟此鳥畏寒乃處以辟寒臺宮中爭以鳥吐之金飾釵珮故宮人相嘲曰不服辟寒金那得聖人心

金縷鳥

哀牢人細奴邏耕於巍山數有祥異社會之日白國主張樂進求率部衆祭孔明鐵柱柱頂故有一金縷鳥忽飛下集於細奴邏左肩相戒勿動八日乃去衆驚異以爲天意所屬進求乃以女妻之因讓國焉自稱奇王是爲南詔

貞鳥

康熙九年有二大鳥巢於祿勸州之補者山前大樹上後雄者爲獵人所傷雌鳥飛鳴尋覓其聲至哀次年春有一鳥來自山後始棲於枝漸近於巢往來飛舞狀若私之是鳥拒不與伍鳥乃飛去明日前鳥復率數鳥來雌鳥拒之如前土人見者遂共傳以爲貞鳥云

松雀

石屏州南箐多松有鳥名松雀喜食松子隨風飛墜卽生松樹不假人

鳥異

前明有蠻哈守備李天常將之任道經橄欖坡有鳥輒夜鳴甚哀天常詢之土人云自思正死後卽有此鳥已三年矣天常祝之曰若果思正卽爲爾復地復仇後遂寂不鳴

角端

宋靈宗嘉定十七年元太祖帖木真征東印度至鐵橋石門關前軍報有獸一角其形如鹿而馬尾色綠作人言曰汝主宜蚤還左右皆懾獨耶律楚材曰此名角端蓋旄星之精能爲四方言語好生惡殺聖人在位則斯獸奉書而至且能日馳萬八千里靈異如鬼神不可犯也太祖

卽回馭石門關在今麗江府東印度蓋指南詔也

象四則

異物志云象之爲獸形體特詭身倍數牛目不踰鬚鼻爲口役望頭若尾馴良承教聽言則跪素牙玉潔載籍所美服重致遠行如郟徙唐咸亨二年田澄國遣使上表言訶伽國有白象首垂四牙身運五足象之所在其土必豐以水洗牙飲之愈疾請發兵翹取象贍隨四時在四腿春在前腿左夏在前腿右如龜無定體也鼻下有爪可拾鍼肉有十二般惟鼻是本肉陶真人言夏月合藥宜置象牙於藥旁南人言象妬惡犬聲獵者裹糧登高樹構熊巢伺之有羣象過則爲犬聲悉舉鼻吼叫循守不復去或經五六月困倒其下因捕獲之耳後有穴薄如鼓皮一刺而弊胸下有小骨灰之酒服令人浮水出沒多食其肉令人體重古訓言象孕五歲始生相傳鄧子龍破緬象陣以象聞酒香則止不行因

埋酒於要隘伏用壯士持長刀刺其耳後薄穴象卽驚走

明劉恂有親表曾奉使雲南緬中蒙族各家養象負重致遠如中土之畜牛馬也蠻王宴漢使於百花樓前入舞象曲動樂作優倡引入象以金羈絡首錦繡纏身隨拍騰踏

明天啓乙丑水西安邦彥瀘州奢崇明糾合烏蒙舉兵犯滇直抵馬龍州銳莫可當人鮮鬥志滇省戒嚴調陶土司兵會剿陶有一象深伏小塹鼻吸泥水數斛乘賊不意突出吼躍鼻噴泥水作雲霧狀直挫賊鋒人馬辟易復卷一悍賊擲空墜地蹴踏如泥賊咸披靡有裨將乘機逐北遂獲全勝及暮收兵象尙勃勃具餘勇鼻中毒矢一次日創劇遍體出瘕三升餘遂斃滇之人德之下葬於城北題其碑曰義勇全城忠烈神之塚後巡撫王伉復建坊於塚前題曰忠勇異象之坊郡人杜其漸有義象傳文不雅馴不載

普洱入思茅古道甚險康熙二十年車里有神象出普夷人跡之自普而返象從一高嶺奔行人步道之遂成通道卽今之班鳩坡也今普藤河畔有象足跡大如斗

虎三則

昔有一白虎浮滇池來噬人無數居民苦之摩迦羅大黑天神忽顯形縛之蹲於座側今虎骨一具尙在昆陽州土主廟中

開化城北九十餘里有山土石相半下寬平多美芻羣爭牧馬忽有人見山下一物白質黑文行動頗馴遇牛馬不搏噬衆奔避以爲虎也越三日復還擬共迹之已不復見有識者曰白質黑文似虎而馴不踐生蟲不傷畜類考之圖記是爲騶虞

元初麗江之白沙里有夷人木都牟地者性剛勇偶抱憤事臥於磐石上須臾變爲虎咆哮躍去至今跡存石上

兩頭鹿

博物志云雲南郡出茶首其音爲蔡茂兩頭鹿也以四月取其胎可治蛇毒永昌有之又魏宏南中志曰雲南郡有點蒼山上有神鹿一身兩頭專食毒草又名食毒鹿又按鄜露赤雅云茶首出羈縻州似鹿而兩頭食香草其行如飛鳴曰蔡茂蔡茂茶首二字音蔡茂也亦有五六頭者是名元仙敬之終吉射之悔亡據此似雲南廣西俱有此物今不惟廣西不聞有此神物卽雲南永昌亦絕無人知之者豈如威鳳祥麟聞世一出耶不可知已

越賧犀

犀生越賧以陷罕取之每殺震雷暴雨梁祚魏國統云西南有犀二角夜行如炬照數百步或時脫角則藏於深滅處不令人見王者貴其異以爲簪能消除凶逆

猿二則

石屏柞嘉山內有一青猿每出見本州士即發解李中和吳國謨皆爲先兆

順治六年蔣逆之叛順寧人多避亂走山谷而順寧城北有瓦罐窰居民李某者將挈家遠引纔行數里自謂渴甚因持一孟將覓取竹下泉飲之經久不返衆疑其遇兵或爲虎豹傷徧尋無可蹤跡數日後其子同人還過故地遠遠見樹下有猿披衣操孟佇立延望舉止酷肖李狀其子大驚迫視之則衣孟誠故物也彼亦不懼復若以意示人或問汝爲某父耶猿亦頷首四顧特不能言耳羣將引使俱來乃長嘯數聲超絕而去明年其子同里人即其地建白猿寺今守寺者爲猿之孫每與人言之不諱

猩猩

永昌郡有猩猩能言其血可染朱罽色鮮不黧或曰若欲刺其血必問之爾與我幾許猩猩曰二升果足其數若加之鞭箠而問之則隨所加而得可以至一斗其說出於華陽國志通志亦同今永昌郡絕無此物彼中人嘗蓋出於三宣徼外古貢道自永昌遂以爲永昌產耳

捕猴

元江夷俗以猴爲盛饌歲時待親賓無此則爲不敬而其捕猴有法不用機弋羅網每春夏時治地栽番瓜如常採擷食用但留一極大者襯墊熨貼盡去其餘之花實枝蔓至秋深則瓜大而堅籐老如索每夜伺之必有猴來盜取其大猴輒自取藤纏束於肩背腰膂間挽之而前群小在後推行餘藤牽牽繚繞不得遽斷人乃起而聲喊羣猴駭散其藤牽蔓挂者俱不得去遂瘞之與瓜同歸腊之以爲饌飲旨蓄之需夷地村村如是而猴利令智昏不能懲也